

四庫全書

史部

欽定四庫全書

行水金鑑卷五十四

江南按察使傅澤洪撰

河水

七月二十五日大學士伊桑阿馬奇折本啓奏奉

旨見今遣人往張鵬翮處著將這次各省行取知縣職  
名鈔出問他此知縣內張鵬翮有曾經識認居官優為  
人好者著明白開寫摺子即付遣去筆帖式關住齎回

啓奏又河水情形各處工程修理若何亦著明白開寫摺子並交與遣去筆帖式齎回啓奏 總河張鵬翮摺

奏黃河入秋以來水勢亦大臣於七月十九日至海濱六套一帶勘閱工程詢據土人僉云今年水勢甚大幸而大通口開通水流入海故隨長隨消不致泛溢唯徐州黃河水長城南石狗湖水勢亦長七月初八日將東門外石岸平墊一段長十二丈內坍塌一段長七丈已經下埽防護無虞仍令原修官俟水落

賠修其餘邳州宿遷桃源清河山陽安東等處黃河工程俱各保固平穩此目前水勢之情形也 陶家莊引河部臣范承勲等原擬七月內完工因秋雨太大河身受有積水見在車戽挑挖王家營引河係奉旨令馮佑挑挖贖罪之工屢行嚴催據道廳等官詳報馮佑違抗不挑應遵不成河不准贖罪之

旨將馮佑交與該道治罪另估挑挖睢寧黃河王家堂加幫月堤作正隄動帑修築據該管署事同知金玉

衡呈報已完工九分見在勒催全完山清安東黃河  
兩岸隄工卑矮之處見在確估造冊加幫臣查勘河  
工至安東二塘汪家莊地方見署同知趙泰甞及守  
備姜逢彩住宿工所親儋加幫戲隄保固險工實心  
任事海口攔黃壩盡行拆去見今黃水通流入海蒙  
欽定大進口佳名萬姓感悅時家馬頭工程已經具  
題動帑委令趙泰甞張士伸等辦料俟水落作速堵  
塞馬家港工程合龍之後西壩被大水漫開已經

題報見在責令承修官馮大奇等購備料物俟水勢  
稍落速行賠修堵塞如敢遲延另疏 題叅大通口  
迤下濱海兩岸隄工委員傅澤洪等分段加幫見在  
僱修嚴催上緊修竣其海口運料小河桃源黃河兩  
岸隄工古溝至六壩石工高郵城南滾水壩高寶江  
都一帶土石堤工歸仁堤相度引河駱馬湖口竹絡  
壩王家營減水壩徐州郭家嘴等處石工段家莊月  
堤嵇家閘缺口處處工程需帑興修戶部所撥五十

萬兩委不敷用見在分案估計請撥錢糧辦料興修

臣謹具摺付筆帖式關住齎捧奏

聞

淮運兩河分見於後

八月

初一日總河張鵬翮題請見任浙江西安縣知縣陳鵬年候補內閣中書舍人張伯行等一十四人調往河工以便分派工程遇有相當員缺保題陞補部議覆允行之 十二月初二日題估挑挖引河看得黃河下流最窄之處無如安東便益門以及對岸韓家莊臣率同道廳等官探量兩岸相距僅六十餘丈又

兼時家馬頭至尹家莊河身太曲對岸沙洲逼溜直  
衝南岸韓家莊而韓家莊已下又突出沙嘴逼溜直  
射北岸便益門且堤高於城勢甚危險應將兩處沙  
洲於中開穿挑挖引河二道使黃流直下以固城池  
以保險工行據淮揚道參議王謙詳估黃河北岸沙  
洲自時家馬頭東對南岸引河尾新河頭起至便益  
門西河尾止估挑引河長五百四十丈應用土方銀  
二千一十四兩五錢又黃河南岸自黃家莊東對北



岸引河尾止估挑引河長五百二十丈應用土方銀一千五百六十六兩二引河下脣又估下埽二箇應用埽料銀五十兩一錢二分連引河并埽箇共估土方工料銀三千六百三十兩六錢二分等因詳估前來臣查時家馬頭已經合龍淮黃已經交會二水合流來春自必增長急應乘時儻挑引河完竣俟桃汛水長開放使黃水直下得以暢流則尹韓二莊便益門三處險工可以稍平又可保安東城社民生除發

帑委員乘此冬令水小僭挑速竣並將原冊送部查核外理合具疏 題估奉

旨這本內事情著照該督所題行該部知道 是月二十日總河張鵬翮題為挑挖黃河灣曲引河事勘得徐屬之楊橫莊邳州之戚字堡桃源之談家口安東之汪家莊四處工程緊要急宜先挑引河 部議奉旨依議速行

聖祖仁皇帝康熙四十年三月十三日內閣中書殷德

珠捧

旨內開康熙四十年三月初五日張鵬翮題請河員應照臺灣例用賠修錢糧應豁免等因據九卿會議不準行具題折奏奉

旨這本收貯爾衙門著爾衙門能馳馬中書一員前往張鵬翮處張鵬翮悉知河務何處作為第一險要工程何處作為其次險工何處作為歲修工程詳加分晰逐段開明再何處衝決應賠修何處衝決不應賠修之處

一併定議具奏這本著差去中書帶來啓奏 回奏江南

徐屬廳邳睢廳宿虹廳桃源廳外河廳山安廳所管  
之黃河自碭山縣起至海口止頻年河身墊高一遇  
水發驚濤澎湃洄悍難禦江南裏河廳高堰廳山盱  
廳所管之湖河自石勘起至高家堰六壩止洪湖水  
勢洶湧一遇西風暴發巨浪如山處處堪虞裏河廳  
所管運河自大墩起至淮關止面臨黃河背坐洪湖  
兩岸受險江南揚河廳所管運河自寶應黃浦起至

邵伯更樓止襟帶三湖若遇大水湖河相連關係運道江南安清中河廳宿桃中河廳所管運河自古城起至仲莊閘止逼近黃河土係虛沙且孫家集迤下于成龍創築子堤河身窄狹束水太緊因係已成之土不便廢棄以上俱屬第一險要工程其裏河廳所管運河自淮安起至涇河止揚河廳江防廳所管運河自灣頭起至瓜洲止宿桃中河廳所管中河自劉老澗起至張家莊止宿虹廳所管運河自支河口起

密灣迤南止邳睢廳所管運河自密灣迤北起至貓  
兒窩迤北止以上俱屬其次險工江南險要工程每  
年必須修理者名為歲修工程如徐屬廳之郭家嘴  
楊家窪楊家莊小店長樊大壩狼矢溝吳家莊谷家  
莊等處邳睢廳之羊山寺董家堂戚字堡三官廟戴  
家樓王家堂等處宿虹廳之蔡家樓彭家堡朱家莊  
大古城陳家道口等處宿桃中河廳之劉老澗上灣  
兜桃源廳之烟墩上渡口龍窩九里岡三岔七里溝

雞甯壩談家莊等處外河廳之湯董莊大茭陵韓家莊尹家莊柴市大車路口朱家溝新港童家營胡家莊御櫪挑水壩等處山安廳之便益門鄭家馬頭時家馬頭等處江南黃運中三河及臨湖工程有頂衝埽灣及風暴打壞浪窩之處隨時補救名為搶修工程更有河性靡常倏爾變遷恐埽工不足捍禦或築越堤或幫裏戩或加幫高厚或挑引河或釘排椿或修石工或建閘壩名為大修工程總之水勢無定目

前形勢如此將來或次險變為險要或險要變為次險亦未可定惟在因時制宜難以逆料若得實心任事之人不恤嫌怨不辭勞苦不避風雨相機修防或事出意外非由人力所致者無論限內限外情實可原案查康熙二十三年十二月初一日奉

旨徐州長樊大壩等處雖經衝決河流未徙該管各官革職賠修俱著寬免欽遵在案嗣後第一險要工程應遵



旨免其賠修其次險工限外疎虞者照例不賠修若限  
內疎虞者仍應賠修如此則賢者知所奮勵不肖者  
知所戒勉咸思保固工程不致虛糜帑金有裨河道  
匪淺鮮矣今三月初四日高家堰風暴大作臣親率  
河官搶修險工濤聲如雷巨浪濺衣身歷不測之地  
設有不虞身命介於俄頃河官之勞苦臣所目擊據  
九卿云臺灣地處海島涉歷風濤故三年即陞黃運  
兩河非臺灣可比等語殊不知臺灣官員只赴任與

去任時兩涉風濤耳河官每年挑伏秋三汛搶修防守常歷風濤之中較安居衙署者迥乎不同又云挑河修隄係河官專責而臺灣之受祿赴官者獨非職任所在乎且臣閱邸鈔吏部議覆直隸撫臣李光地題補子牙河主簿楊芳一疏如三年果能稱職照清河之例即行陞用等語此又有例可援者也蓋鼓勵勞員正欲保固河工節省帑金永保安瀾之績以

仰副

皇上宵旰厯懷河工至意況臣行年五十三歲形神疲  
僊鬚髮蒼白三年為期甚遙保題河官之時能保  
臣之尚在河工乎此亦可以白臣心之無私矣至於  
直隸除永定河外其餘工程及山東河南河官所管  
工程次於江南應仍照見行例行黃淮交會河工並  
成仰荷我

皇上聖明獨斷睿慮精詳乃克有此臣謹遵

旨敬陳末議伏乞

皇上乾斷施行 是月十七日部覆河南巡撫徐潮題  
為題明事一疏奉

旨該部知道 臣等議得先經臺臣李原吕條奏疏稱  
自戴家樓起至儀封交界止隄工三十里計長五千  
餘丈係河南考城縣地方康熙二十五年歸併曹縣  
修理請將此三十里堤工仍歸河南考城縣官民修  
築等因經臣部覆令總河等會同河南山東巡撫等  
定議具題等因奉

旨這事情著河南巡撫山東巡撫委官會勘定議具奏  
今據河南巡撫徐潮會同山東巡撫王國昌疏稱據  
河南管河道李言署山東濟寧道事兗州府運河同  
知羅景會勘定議前來查此工乃前任河臣靳輔奉  
皇上面諭親看全河形勢以河南考城縣北岸堤工五  
千餘丈界連山東曹縣境內所衛者係曹縣之地換  
歸曹縣就近修防歷今十有餘年深有益於運道民  
生應仍遵照題定改換之成規但查曹邑換歸堤工

考邑已協夫五十名茲再議於南北兩岸各縣鄉堡  
夫內抽撥夫四十名共工食銀一百四十四兩同協  
夫銀一百八十兩共銀三百二十四兩移解曹縣催  
夫取具曹縣印領報銷等因前來應均如該撫等所  
題可也奉

旨依議 四月初四日內閣中書殷德珠捧

旨內開康熙四十年三月二十六日大學士伊桑阿馬  
奇王熙吳璥熊賜履張英學士法良辛保希福納傳

紳范承烈王九齡曹鑑倫等以九卿議覆河道總督  
張鵬翮題為河員應照臺灣之例叙用及懇免賠修  
錢糧等事毋庸議並分晰險要歲修工程摺予奏請  
奉

旨據張鵬翮疏稱黃河自碭山縣起至海口止湖河自  
石礪起至高堰六壩止運河自大壩起至淮關止自寶  
應起至更樓止自古城起至仲莊閘止俱屬第一險要  
工程運河自淮安起至涇河止自灣頭起至瓜洲止自

支河口起至貓兒窩迤北止中河自劉老澗起至張家莊止俱屬其次險工等語但水性靡常倏爾變遷歲修工程或變為險要險工淤塞即變為歲修督理此等工程各官內亦有實心効力奉行者然不無隨衆塞責之員豈可俱照臺灣之例一體叙用又疏稱九卿但知臺灣官員赴任去任俱有冒涉風濤之險殊不知風濤之險河員不時冒涉等語其臺灣官員定有歷俸三年即行陞遷之例本意迴殊並非僅為越海冒涉風濤起見



張鵬翮未悉此意這事情前著九卿題覆會議准行與九卿無涉朕以事關更改條例難以遽為准行故遣人詢問此情節張鵬翮未嘗不知且河員見今俱係保題從優補授若將河員照臺灣之例叙用必致更改條例如此更改則吏兵工三部條例俱致更改矣今將河員若照臺灣之例叙用或仍補授河工員缺乎或陞補他省員缺乎若陞補他省則河工歷練之員同時陞去獨剩新任之員有無裨益河工之處未經議及即今河員

已經歷任二載其限三年自任事之日扣算或自今歲明歲扣算又疏稱伊行年五十三歲再過三載能保尚在河工等語如此則張鵬翮後接任河臣焉知從前官員賢否乃欲將河員遽為陞用此等情由並未聲明行令張鵬翮將三部條例逐一再行詳查確議具奏仍著原遣中書前去將九卿議覆准行稿鈔寫給前往中書齋去與張鵬翮看回奏切念河工潰敝之後荷蒙我皇上指授治河方略明晰精詳乃致黃河漸次刷深中

運二河深通糧船過行六壩全開淮黃交會黃童白  
叟皆感頌我

皇上如天之仁微臣受

聖主知遇深恩慚無報稱竊喜河工垂成鼓勵勞員盡  
心河務故援三年即陞之例

上請茲伏讀

聖諭仰見我

皇上至聖至明洞鑒深遠微臣愚陋見不及此河員若

照臺灣之例敘用誠如

聖諭非僅為風濤起見又必致更改條例如歷練之員或同時陞補他省誠恐新任之員未必盡諳河務倘蒙

俯允定例之後扣算三年為期甚遙其中並無過愆合例之人亦難多得且將來接任河臣未必盡知從前官員之賢否似應將照臺灣三年即陞之例照九卿毋庸議其河員之中有實心効力奉行者容臣於河

工告成之日照例具題請敘如怠廢河務侵冒錢糧者不時糾叅總之微臣受

恩最深凡有關河工之事雖一得之愚冒昧陳請可

否伏候

聖裁恭遇我

皇上聖明在上恩同天地明並日月不加譴責容臣再行詳議具奏不勝感激涕零臣謹具摺付中書殷德珠齋捧謹奏請

旨 七月三十日總河張鵬翮題報開放陶莊引河日期九月初一日奉

旨張鵬翮奏稱開陶莊引河黃河水向北岸流去等語若黃河水向北岸流離清口甚遠乘此時自范承勲等所築挑水壩起寬長加築隄岸過清口將黃河清口之水儘向下流再合為一處則黃河之水可永無倒灌之虞朕先曾面敕過于成龍今在河官員亦有知者著張鵬翮將此事問知道的官員詳明定議其修堤所需錢

糧即為估計所修之處著畫圖速行具奏此事甚為緊  
要不得輕忽該部知道 九月二十三日總河張鵬翮  
題準部咨到臣敬誦

天語仰見我

皇上至仁如天大智若神治河方略

睿照於事前應驗於事後

指示周詳平成永賴誠超越萬世之

聖謨也臣自工所星馳至清口齊集衆河官詢問曾知

此事之員止據原任同知常維禎筆帖式馬泰回稱  
曾聞得前任總河于成龍云奉

旨接長挑水壩過清口使黃水不得倒灌但我等未聞  
其詳等語臣謹遵

聖謨指示自范承勳所築挑水壩起加築堤工至清口  
西壩長四百八十丈五尺頂寬六丈底寬十丈再查  
西壩見長二十丈今再接長五丈新舊合長二十五  
丈俾清口黃河之水向北下流過惠濟祠後合為一



處益加暢沛黃水可永無倒灌之虞十月初六日奉  
旨九卿詹事科道會同速議具奏 議覆奉

旨依議速行 十一月二十六日總河張鵬翮謹題為

河工仰賴

聖謨底績有慶恭祈

聖駕親幸閱視指授善後方略以永保平成事伏惟我  
皇上至仁如天大智若神勵精圖治中外晏安獨有河  
工一事尚塵

聖懷宵旰憂勤

親臨閱視洞悉原委區畫精詳畀臣督河重寄臣庸  
愚未諳河務凡治河事宜一一仰遵

聖訓夙夜兢惕恒以弗獲欽承

聖訓是慮蒙我

皇上指授疏通海口乃得水有歸路黃河刷深

指授堅築高堰并廣闊清口乃得引淮水暢流而出

指授築歸仁堤導泗州上源之水入於河

指授疏人字芒稻等河引運河之水注之江

指授築挑水壩疏陶莊引河逼黃水而暢清流使永無  
倒灌之虞

指授挑蝦鬚等河引下河積水入於海其餘各處工程  
指授周悉莫能殫述今黃運兩河水循故道漕運利涉  
民田樹藝淮揚蒼生黃童白叟咸頌

皇上天授神智峻德豐功亘古莫比其盛但河工甫得  
就緒保固更為緊要其間尚有應修之處與善後之

計微臣學識淺陋固知所措日夕兢兢恭祈

聖駕於來春二月桃汛未發之前

親臨河工再賜

指授應修工程與善後方略俾臣知所遵循始終仰賴  
聖訓永保安瀾克奏平成之績且東南臣民深受

皇恩戀

主之心實為誠切顙望

翠華臨幸亦得慰瞻

天仰

聖之忱矣奉

旨這所奏知道了該部知道 十二月二十日為題明  
事看得山陽縣黃河南岸運料河原任河臣董安國  
在於遵

旨具奏事案內題准動帑挑挖未竣旋被童營漫缺淤  
墊經署理總河印務原任府尹徐廷璽題叅撥給捐  
工人員挑築亦未完工臣查明具題催追在案臣往

來看工相度形勢查運料河頭起於檀度寺閘久已  
築壩堵閉詢問其故據土人云運河高於運料河數  
尺恐其開放建瓴之勢直洩無餘是以歷來堵閉臣  
測量水平果與土人之言無異夫既堵閉則此河為  
無源之水不能通濟下流亦難運料是此河已無益  
於運河矣且汰黃堤原為黃河南岸重門保障運料  
河身居汰黃縷堤二隄之中從前挑挖此河將草灣  
并小茭陵二處汰黃堤穿斷雖築有單壩難資捍禦

是此河又有礙於堤工矣況歷來運料因此河未成  
係由黃河射陽湖轉運以濟工需是此河既不能分  
洩運河水勢反將有用之汰黃堤窵斷誠屬無益應  
停其挑挖將穿壞汰黃堤二處填築堅實以作黃河  
重門之保障固淮安地方大有裨益其各員應追銀  
兩追解河庫以備別工之用奉

旨該部議奏 議覆奉

旨依議

以上俱張文  
端治河書





行水金鑑卷五十四

欽定四庫全書

史部  
行水金鑑卷五十五

詳校官監察御史臣王爾烈

刑部郎中臣許兆椿覆勘

總校官知縣臣繆琪

校對官編修臣沈清藻

謄錄監生臣朱清渠

欽定四庫全書

行水金鑑卷五十五

江南按察使傅澤洪撰

河水

聖祖仁皇帝康熙四十一年六月初三日大學士伊桑  
阿馬齊張玉書吳璵熊賜履學士來道常壽鐵圖紀  
爾塔渾王九齡曹鑑倫劉光美等奉

上諭朕因永定河南岸不時衝坍特旨令將南岸修築

石隄看來甚有裨益今黃河南岸自徐州以下至於清口通行修築石堤可否永遠有益若果有益見在國帑不為缺少朕於錢糧一無所惜修築此堤應於何處採取石料作何轉運約幾年可以告成著張鵬翮齊集河員詳議具奏 總河張鵬翮摺奏我

皇上仁德如天欲河定民安萬世永賴之盛心也臣以事關重大隨調集衆河官詳議咸稱堤岸建修石工必得地基堅實釘椿砌石庶有捍禦之資若黃河水

性無常遷徙靡定沙土虛鬆險工之處水深三四丈  
不等難以釘椿若另築越隄修砌石工而臨河險工  
每年歲修仍不可廢恐致重費錢糧若棄險工而不  
修異漲之水勢若排山又恐石工有坍卸之虞即如  
高堰土性堅實從前所修龍門大壩等石工尚有坍  
卸之虞況黃河鬆虛之地乎故黃河止有徐州之郭  
家嘴清河之惠濟祠緣山根土岡量修石工其餘兩  
岸並未通行興修誠以土有虛實之不同也且委員

查看黃河自河口至徐州南岸長六萬六千七百零  
一大五尺約需銀一千二百七十八萬五千九百六  
十兩五錢零北岸除山岡不修隄外計長五萬四千  
三百九十八丈二尺約需銀九百九十九萬七百六  
十二兩五錢零工巨費繁曠日持久錢糧易致花費  
告成難以預料臣等愚昧所以未敢輕為擬議伏惟  
我

皇上聖明天縱治河方略咸荷

聖謨指授乃克底績臣等識見卑陋實無補於涓滴謹  
將黃河兩岸土性虛鬆遷徙靡常情由據實奏明其  
應否修砌石工之處伏候

睿裁 七月二十二日總河張鵬翮謹題為恭報微臣  
勘明黃運兩河水勢漸消隄防保固仰慰

聖懷事竊照今年伏汛水勢大長甚久已於恭報伏汛  
水勢情形疏內題明在案詎意題報後水勢猶復浸  
長黃河兩隄之烟墩車路口韓家莊童家營鄭家馬

頭二塘王家堂戚字堡狼矢溝雞甯壩顧家莊等處  
險工屢報危險又高家堰湖水漸長於閏六月二十  
三日至七月十四等日常起西風大暴巨浪拍擊堤  
岸處處報險臣四下奔馳親督各汛官晝夜竭力搶  
救幸獲無恙但積水難消堤根浸虛風浪撞擊在在  
堪虞正在籌畫宣洩之際見惠濟祠下黃水漸落三  
四寸從北各汛亦報漸消據山安同知裘陳珮報稱  
閏六月二十六日大通口下二十餘里有西礮汛之



臧家溝值黃水頂衝漫約開三百餘丈河流不移深  
省水勢分支由運料小河六十里直出海口分洩黃  
溜以致水勢漸消而各處險工得保無虞臣聞報過  
往查看臧家溝以下俱係一片蘆蕩溢出水由運  
料河至八灘會同正河入海查此處在大通口下原  
屬海濱曠衍無關運道民生乃先年宣洩黃流入海  
之處原無堤工自前河臣靳輔因黃水未曾故創築  
縷堤水大聽其漫溢水落仍復歸漕于工程絕無妨

礙查舊案內靳輔曾云河道大壞之時非築堤不能  
束水河道俱已寬深此堤雖有坍却亦屬無礙等語  
今淮黃會流通暢兼之今年水勢異漲大通口以下  
堤岸逼窄實難容納正可仍留此處口門宣洩異漲  
以保上源各處險工俟水落淤淺再行相度形勢或  
堵或留酌議奏聞臣勘馬家港口門漸淤全黃盡趨  
大通口寬闊深暢八灘以下海口積沙盡去極其深  
通復勘烟墩等工各官奮力搶護見在平穩運河工

程亦俱保固平穩高家堰六壩一帶工程遇有汕刷  
隨即修補平穩疏內題明宣洩異漲之鮑家營茆良  
口天然壩清水溝等口門俱可暫停開放其下河一  
帶稻禾成熟民居晏然臣所遍歷之處據土人咸稱  
今年水勢大過三十五年幸賴

聖主軫念民生指授治河方略精詳周至以致河底深  
通堤岸堅固小民獲享盈寧感頌

皇恩歡聲遍野除秋汛情形至期照例另疏題報外臣

思我

皇上仁德如天無時不以河工為念所有目前微臣勘  
明水勢漸消隄防保固情形理合具疏報聞恭慰  
聖懷伏乞

皇上睿鑒施行奉

旨該部知道 九月初六日總河張鵬翮謹題為恭報  
秋汛水勢情形事該臣看得今年秋汛黃運湖河水  
勢情形據各廳呈報黃河自徐州以至海口加長六

尺四寸及三尺九寸不等然皆漸次消落兩岸歲搶  
工程相機修防俱各平穩馬家港前此水深數丈今  
已淤平黃水盡由大通口暢出海口極其深通其大  
通口迤下之臧家溝漫水今由高門港口門歸入正  
河入海中河之水由鹽河及劉老澗減壩分洩淮揚  
運河之水由涇澗人字芒稻等河分洩各處工程俱  
已修防平穩歸仁堤工程亦俱防守平穩高家堰及  
六壩工程遵

旨加謹保固畫地防守隨時搶修隄防俱保固平穩其  
高承爵承修高澗大壩未完工程見在嚴催修理如  
再遲延另疏題報天然二壩竟未開放扶淮水使強  
暢出清口以敵黃水大長之勢今伏秋二汛黃淮并  
漲大過三十五年之水賴有挑水壩加築寬長逼黃  
河大溜直趨陶莊引河循北岸而行引河首尾刷成  
大河故清水得以暢出黃水絕無倒灌之虞立大墩  
一望滿河皆屬清水惟見一線黃流河濱土著耆老

歎以為從古未有今年入夏始而雨水連綿繼而水  
勢大長幸河道深通水由地中行即如高寶興泰等  
處最稱窪下俱得田禾收穫民居晏安黃童白叟咸  
頌

聖主盛德豐功拯救數百萬生靈出昏墊而登樂土歡  
聲雷動徧於郊原此皆我

皇上帝畫精詳

聖謨獨斷乃克臻此所有秋汛水勢情形理合具疏

題報伏乞

皇上睿鑒施行奉

旨覽奏挑水壩築成逼黃河大溜直趨陶莊引河循北岸而行黃水從大通口暢出海口極其深通淮水從清口暢流敵黃絕無黃水倒灌之患高家堰堤工完固加謹防守經伏秋大漲俱獲平穩運河水由涇澗河人字芒稻等河分洩各處工程亦皆保固知道了該部知道是月十五日總河張鵬翮謹奏為仰賴



聖謨河工底績恭請

睿裁指示善後機宜事欽惟我

皇上勵精圖治中外敦寧

聖德神功亘古莫並獨有河工一事每厯

睿慮念國計民生攸係

親臨閱視洞悉原委區畫精詳

宸衷獨斷指授方略盡拆攔黃壩以通海口加築挑水

壩開陶莊引河以導黃汛北行加培高堰堵築六壩

以東淮敵黃挑張福口裴家場張家莊等引河以暢  
淮流修築歸仁堤引河閘座以節宣睢水加築黃河  
堤岸以固隄防堵邵伯更樓等口以利轉輸塞時家  
馬頭以杜黃水旁溢修理運河兩岸排椿濬深運河  
改修中河以利漕運疏人字芒稻河涇澗等河以洩  
運河異漲之水挑海溝蝦鬚等河以洩下河積水新  
建高郵南關車邏等處滾水壩以資蓄洩開王家營  
減壩挑鹽河以洩清黃異漲之水寔戚字堡等引河

逢灣取直以分水勢一應緊要工程次第修理俱已  
完畢今歲伏秋大水黃淮并漲逾月不消水勢大過  
三十五年依然隄防保固淮水敵黃海口通暢目今  
運道深通民田耕穫苗童白叟感戴

天恩咸頌

聖主天縱神智又不惜數百萬帑金治河底績拯救億  
萬生靈出昏墊而安樂土歡聲如雷洋溢郊原此皆  
我

皇上睿慮周詳

聖謨獨斷燭照於事前符驗於事後德同天地功邁百  
王誠萬世永賴之偉績也微臣自慚學識淺陋前此  
治河工程皆荷

皇上指示今工程修畢經過大水之後一切善後機宜  
伏乞

皇上親臨指示不特微臣知所遵循即東南黎庶亦得  
遂瞻

天仰

聖之望矣臣謹具疏繪圖差淮徐道張弼同知李梅恭

呈

御覽伏候

聖裁 河圖總說欽惟我

皇上德侔天地澤被寰區武功著定文德覃敷功化之  
隆亘古莫比其盛河工一事猶厯

睿慮今仰賴

聖謨平成底績方略周詳名言莫罄臣謹考黃河自崑崙歷雍豫兗徐至淮之清口會淮而入海淮瀆自洛及鳳歷盱泗至清口會黃而入海是清口為河道之關鍵也但黃勢怕強而淮勢怕弱必有以抑其強而扶其弱乃資其利自前河臣誤築攔黃壩而海口淤塞六壩潰決而淮水東注二瀆不交國計民生俱受其敝矣我

皇上天縱神智軫念民生三巡河道洞悉形勢

宸衷獨斷指畫精詳如拆攔黃壩以通海口築挑水壩  
濬陶莊引河以疏黃流開張福口裴家場等河以導  
淮水加培高堰堅築六壩以束淮敵黃而淮黃交會  
矣濬運河增漕堤而運道安開人字芒稻等河引水  
注之江濬涇澗海溝蝦鬚等河引水注之海而下河  
治其他疏築工程具有成效而最要者在清口大闢  
黃淮交會雖遇伏秋異漲依然清淮透出逼黃遠避  
絕無倒灌順軌安流淮揚一帶黃童白叟歡欣歌舞

感頌

皇仁謂為數十年來所未有皆我

皇上睿謨深遠

聖慮精微臣愚唯有潔已奉公殫力河干以凜遵成算而已茲值工完理合繪圖恭呈

御覽

兵部尚書兼都察院右都御史總督河道提督軍務

臣張鵬翮恭



進 十月初五日奉

旨已有諭旨了該部知道繪圖并發 是月十六日總  
河張鵬翮謹題為據呈代題恭請

聖駕來春蚤臨河工以慰臣民顙望事據文華殿大學  
士兼禮部尚書致仕張英原任福建巡撫宮夢仁日  
講官起居注翰林院侍讀學士史夔翰林院編修吳  
世燾翰林院庶吉士劉師恕原任右春坊右諭德兼  
翰林院修撰楊大鶴翰林院庶吉士周彝翰林院編

修顧圖河翰林院庶吉士徐昂發候補僉事道程兆  
麟原任吏部文選清吏司郎中劉始恢原任山東提  
學道劉謙吉原任山東提學道陸鳴珂原任陝西提  
學道陸德元原任湖廣提學道岳宏譽原任福建提  
學道史陸輿原任福建提學道汪薇候補主事李清  
仁候補刑部主事程兆彪原任工部屯田司主事劉  
愈原任福建延平府知府張楷原任浙江麗水縣知  
縣賈其音原任浙江台州府同知連璧原任內閣中

書舍人李時震原任直隸故城縣知縣許國璠原任  
浙江嘉興縣知縣許肇起原任直隸贊皇縣知縣成  
永健原任廣東英德縣知縣劉洛中原任河南夏邑  
縣知縣張豹進士杜光先史泓許迎年舉人高天驥  
喬崇烈邱聞衣王式丹賈良璧賈珩賈邦楨張默王  
蕙成申朱纘喬兆棟喬倣王爵王懋訥李同聲劉肇  
鈇張翥高克騫周憲沈儼生員張千來張湛蔡公錫  
蔡日芝等呈為恭請

聖駕臨視河工以慰臣民顙望事我

皇上堯仁溥被禹智旁周文德武功亘天彌地含生負  
氣食福飲醇惟茲淮揚一路頻罹水沴上厪

聖懷

法駕三臨指授方略不惜萬億帑金拯此一方民命諸  
如建挑水壩開陶莊引河使黃流不致倒灌闢清口  
拆攔黃舊壩使二瀆得以歸墟上河治則下河自治  
黃如隄障洪湖清流流出則濁流自通惟在堅閉六壩

濬人字芒稻等河以疏入江之路塞邵伯更樓諸口  
以收轉漕之功大挑運河去二十年之淤墊堅築歸  
仁灑數百里之漫流下及涇澗蝦鬚諸河無不通利  
商民兩便田廬俱復桑麻被野童叟歡呼此皆我  
皇上愛民之周憂民之切心叅造化手畫平成之所致  
也昨蒙具疏恭請

聖駕閱視河工指授善後方略英等不勝懽欣迎至宿  
遷見所在紳衿百姓無不踴躍欣感翹首雲霄伏聞

聖駕未即臨幸老幼提攜叩顙瞻

天忱悃殷切懇乞代為題達恭請

聖駕來春蚤臨河工以慰輿情瞻仰蟲魚草木待

鑾輅以春回父老人民覩

翠華而雷動等情又據淮揚二府各州縣士民陸權韓

文挺于廷諫張國瑞張敬李自明韓邦佐李長年楊

天培楊起先余仲林余祥白華徐子觀金朝興殷士

貴葉起管章張東曉等公具呈為

聖恩弘敷萬民感謝懇賜代題請

駕南幸以慰輿情事切惟黃淮二瀆自古為患數年以來疊被水災幸蒙我

皇上德邁唐堯功高神禹軫念民生頻蠲租賦三次

親閱河工指授方略不惜數百萬帑金堅堵六壩大闢清口東淮制黃海口深通河流順軌水不旁溢歷來沉沒之田盡獲耕種巨浸澤國一旦變為膏腴萬姓樂業永奏平成今蒙恭請

聖駕親臨閱視再授善後方略民生慶幸市野歡騰茲  
聞

聖駕未即臨幸環謝下情未能上達瞻

天仰

聖之心翹望愈切為此虔叩軫念輿情准賜 題請恭

迎

聖駕蚤幸江南以遂萬民欣覩

天顏之願等情又據河工効力內閣學士兼禮部侍郎



張榕端翰林院侍講張希良翰林院侍讀學士史夔  
候補左春坊左諭德鄭開極原任詹事府少詹事邵  
遠平候補僉事道程兆麟原任貴州布政司王毓賢  
原任山東提學道劉謙吉原任湖廣岳常道姚淳燾  
原任山東提學道陸鳴珂原任陝西提學道陸德元  
原任湖廣提學道岳宏譽原任福建提學道史陸興  
原任福建提學道汪薇工部屯田司郎中丁易原任  
員外達古禮工部郎中王進楫工部員外王登魁候

補刑部主事程兆彪候補中書科中書張伯行候補  
內閣中書楊守知候補內閣中書楊穆候補知府李  
雯候補知府傅澤洪原任同知夏宗堯原任同知連  
璧等恭請

聖駕閱視河工懇賜代題以慰臣工瞻仰事欽惟我  
皇上德邁唐堯功高神禹念淮揚二郡頻罹水患不辭  
勞苦三次

親臨河工相度情形指授方略不惜帑金數千百萬拯

此一方之民建挑水壩開陶莊引河關清口疏海口  
開六壩培高堰挑運河築歸仁堤浚人字芒稻等河  
國計民生萬世永賴皆係

庠筭所周亘古軼今史冊罕覯向蒙恭請

聖駕親臨閱視指授善後事宜江淮之間歡聲雷動至  
榕端等望日瞻雲尤為迫切不啻百谷之仰膏雨草  
木之被陽春茲聞

聖駕未即臨幸瞻望微忱未能上達為此懇代 題恭

請

鑒興於春陽和煦之時蚤臨河工以慰瞻

天仰

聖之意各等情到臣據此該臣等會看得據江南鄉紳  
致仕大學士張英等士民陸權韓文挺等効力河工  
官員張榕端等呈稱我

皇上堯仁溥被禹智旁周文德武功亘天彌地含生負  
氣食福飲醇惟茲淮揚一路頻罹水沴上塵

聖懷

法駕三臨指授方略不惜萬億帑金拯此一方民命諸  
如建挑水壩開陶莊引河使黃流不致倒灌闢清口  
拆攔黃舊壩使二瀆得以歸壩上河治則下河自治  
莫如隄障洪湖清流流出則黃流自通惟在堅閉六壩  
浚人字芒稻等河以疏入江之路塞邵伯更樓諸口  
以收轉漕之功大挑運河去二十年之淤墊堅築歸  
仁灑數百里之漫流下及涇澗蝦鬚諸河無不通利

商民兩便田廬俱復桑麻被野童叟歡呼此皆我

皇上愛民之周憂民之至心叅造化手畫成平之所致

昨聞

聖駕閱視河工再授善後方略臣民無不踴躍欣感翹

首雲霄伏聞

聖駕未即臨幸老幼提攜叩顙瞻

天忱悃殷切叩懇代為題達恭請

聖駕來春蚤臨河工以慰輿情等因前來臣等見江南

臣民感戴

天恩顯望

聖駕來春蚤臨河工共伸瞻覲之誠情詞懇切不敢壅  
於

上聞謹會同江南江西總督臣阿山總漕臣桑格江寧  
巡撫臣宋榮安徽巡撫臣俞成龍具疏 題達伏乞  
皇上睿鑒施行奉

旨知道了該部知道

聖祖仁皇帝康熙四十二年二月初三日河道總督臣  
張鵬翮奉

上諭看黃河磯嘴壩太短不能逼溜今欲照永定河修  
長挑水壩回奏永定河與黃河水勢不同黃河萬里  
而來勢大水深磯嘴加長一遇水長易致衝壞河官  
慮賠修之苦不敢接長又奉

上諭將一兩處試作長挑水壩即有衝壞免其賠修  
又奉



上諭烟墩甚險雖有越堤必須保守縷堤此挑水壩應  
行建築 初四日辰時河道總督臣張鵬翮奉

上諭桃源烟墩至龍窩一帶堤工卑矮應行加高 三  
月初三日河道總督臣張鵬翮奉

上諭王家營對過鮑家營開引河洩黃漲之水以保障  
清江淮安地方著即開挑兩岸築堤以衛民田 又奉  
上諭黃河逢灣取直開挑引河必須於對岸水淺之處  
築挑水壩逼溜入引河方為有益 又奉

上諭開減水壩須於水緩之處不可迎溜以防奪河

初四日奉

上諭半路劉河流埽時堤岸單薄應修挑水壩

御製河臣箴舟中書賜河臣張鵬翮

自古水患惟河為大治之有方民乃無害禹疏而九平  
成攸賴降及漢唐決復未艾漸徙而南宋元滋溢今河  
昔河議不可一昔止河防今兼漕法既弭其患復資其  
力矧此一方耕鑿失職澤國波臣痼瘵已極肩茲鉅任

曷容怠佚母俾金堤潰於蟻穴母使田廬淪為蛟窟母  
徒糜國帑而勢難終日母虛動畚築而功鮮覆實務圖  
先事盡利導策莫悔後時飭補苴術勿即私而背公勿  
辭勞而就逸惟潔清而自持兼集思而廣益則患無不  
除績可光冊示我河臣敬哉以勗 十月初一日奉

上諭諭吏工二部黃淮兩河關係運道民生最為重要  
朕念治河國家大事夙夜屢懷未嘗少釋披圖咨衆雖  
已悉其源流顧水勢變遷不常必真知洞悉方可實見

施行是以不憚勤勞屢親巡閱察其險易之形勢審其  
疏導之機宜緩急次第具有成畫至於簡命河臣倚任  
甚切凡所屬官吏皆聽選用大修工程費以數百萬計  
歲修帑金亦以數十萬計乃康熙三十七年黃淮並漲  
總河董安國不堅築隄堰疏通海口因而河身墊高溢  
出河岸以致倒灌洪澤湖口湖水從六壩旁洩由運河  
入下河淹沒民田於是罷董安國以于成龍代之朕隨  
授以治河方略詳加指示三十八年親往閱河駐蹕清

口河干又面諭于成龍清口宜築挑水壩挑黃水使趨北岸方可免黃水倒灌之患隨指定其地再三申命于成龍不遵朕旨致無成功及用張鵬翮為河道總督面諭云頃已發帑數百萬令大臣官員往高堰築隄閉六壩使逼洪澤湖水暢出清口而清口築挑水壩尤為緊要此壩不築則黃水頂衝斷不能使向北岸湖水不得暢流張鵬翮遵朕言壩工築成黃溜遂直趨陶莊清水因以直出疊經伏秋大漲並無倒灌之事其浚張福口

引河築歸仁隄疏人字芒稻涇澗等河開大通口皆遵  
朕旨一一告竣今年春朕閱河至桃源見龍窩等處頂  
衝危險命增築挑水壩此壩工刻日訖事河勢遂平中  
河仲莊閘口以與清口相對特命改由楊家莊漕輓安  
流商民利濟曩時黃水泛漲或與岸平或漫溢四出今  
黃河深通河岸距水面丈餘縱遇大漲亦無可虞矣張  
鵬翮所修工程雖悉經朕裁斷而在河數載殫心宣力  
不辭艱瘁又清潔自持一應錢糧俱實用於河工無纖

毫浮耗朕心深為喜悅所屬大小河員並皆勉力赴工  
共襄河務亦屬可嘉自總河以下各官爾二部即詳加  
議叙具奏特諭

已上俱河防志 河防志即張文端公治  
河書也初不知其改名故前後皆仍其舊

十一月初六日總河張鵬翮奉

上諭河南黃河係處上游宋元以來每煩修治爾將河  
南黃河兩岸勘閱有工程險要之處令修理堅固

河南管  
河道治

河檔  
案

一烟墩險工於四十二年

皇上親閱在於大王廟東

指示建築挑水壩一座長十五丈三尺五寸寬五丈發帑遣分司齊蘇勒建築一龍窩張家莊險工四十二年

皇上親閱

指示建築挑水壩一座壩臺長二十七丈三尺壩身出水長十丈寬八丈發帑遣分司齊蘇勒建築一九里岡險工於四十二年



皇上親開在於大王廟東

指示建築挑水壩一座長九丈八尺寬四丈發帑遣分  
司齊蘇勒建築 一九里岡險工四十二年

上南巡回鑾

指示舊龍門處建壩二座內第一座長十四丈寬五丈  
第二座長十三丈寬五丈 一半路劉險工四十二  
年

皇上南巡在於上水頭頂衝處所

指示建築挑水壩一座長五丈寬八丈上下雁翅各長

八丈發帑建築

淮徐道屬  
三廳冊

聖祖仁皇帝康熙四十四年四月十九日河南巡撫趙

闕

題為欽奉

上諭事部議得回回寨與韓羅灣一帶乃祥符陳留蘭  
陽三縣連界地勢極為卑窪復有大堤一道並無重  
堤可恃即大堤之處卑矮單薄倘遇黃流暴發不足  
以資防禦今估築加幫接高堤工長二千一百三丈

連填墊河形共計土方工銀一萬三千三百四十  
六兩四錢並無浮冒等因應如所題速行幫築工完  
核減造冊題銷可也奉

旨依議

河南管河道  
治河檔案

聖祖仁皇帝康熙四十六年五月十五日

上諭黃河兩岸工程河官修理的好伏汛水長再加謹  
防護惟河南黃河上游工程關係最為緊要伏汛水長  
著加謹修防其黃堦壩工程更為緊要著差賢能官員

前往防險相度形勢修建挑水壩挑溜開行時總河張鵬翮遵即動帑修建挑水壩一座并下護涯埽七十

丈歷年委官駐防

河南管河道  
治河檔案

聖祖仁皇帝康熙四十八年二月三十日河南巡撫汪灝題為建壩已成等事部議得先經河道總督今陞戶部尚書張鵬翮會同河南巡撫汪灝以河南黃河南岸黃堽壩係舊日險工居黃河上游關係緊要奉  
上諭修建挑水壩一座挑溜開行又於上水埽灣處下

護涯埽七十丈其黃堦壩險工既已新建挑水壩應  
照江南歲修例每年用料修防以垂永久令撫臣就  
近料理又據河南巡撫汪疏稱挑水壩工修建已竣  
第險要之處新建壩工及下過埽箇大溜衝刷誠恐  
桃伏秋三汛水發勢必蟄陷歲修防護萬不容緩應  
如所題准其修理奉

旨依議

河南管河道治河檔案  
挑水壩一座亦奉

趙世顯又題請於挑水壩上再建

育允

行

聖祖仁皇帝康熙五十年六月二十八日河南巡撫鹿  
祐題為新壩建築已成等事部議得先經河南巡撫  
鹿祐以馬家道口新建壩工正當舊壩上流先受頂  
衝之勢比舊壩更為緊要應照舊壩請給歲修銀兩  
辦料修防等因臣部以黃河工程例有保守年限今  
前項工程甫經告竣未及一年何得遽請歲修覆令  
該撫俟保守限滿具題到日再議今據該撫疏稱虞  
城縣馬家道口新建挑水壩係康熙四十九年六月

內建築完工業已保固一年且新建之壩居大壩之上流先受頂衝之勢較之舊壩更為緊要若不照例歲修一遇汎水漲發恐新壩蟄陷而大壩亦難保固歲修防護誠不容緩請給歲修銀兩辦料修防應如所題准其歲修奉

旨依議康熙五十三年因河流北行壩前漲出淤灘巡

撫李

會題停修

河南管河道  
治河檔案

聖祖仁皇帝康熙五十九年十二月內准揚道傅澤洪

詳揭報料物本道屬各河廳遠近不一其所運料物之虛實與做過工程之勤惰一時耳目不及周知是以飭令揭報便於臨工稽查舊例廳官歲搶修各工以及大工料物辦運到工該汛員弁查明各料觔重尺寸數目收貯各廠五日一次揭報本部院暨本道衙門存查開工之後每日將所下埽箇鑲填高寬丈尺簽樁尺寸根數以及力作兵夫數目亦五日一次揭報院道聽候勘驗法良意美歷久遵行無異詎今



日久法弛各汛員弁陽奉陰違有名為五日一揭或積至三五揭十餘揭一總彙報者有前後日期料物數目牽混不清故為朦混者有任意延捱竟不揭報者各工料物收支數目揭報既已不清及臨工勘驗勢必將無作有以少報多茫無頭緒從何稽查總緣積玩相沿以致良法雖存奉行不實除本道一面嚴飭遵行外相應詳請查照舊例通飭嗣後各廳工料該汛員弁查明收支數目以及兵夫名數據實五日

一次開揭呈報查考如敢仍前抗違牽混及彙揭總報者照溺職例詳揭咨斥如此則積習可除揭報不混料物清而稽查便有裨工程多矣

嚼梅軒  
偶存

聖祖仁皇帝康熙六十年正月日淮揚道傅澤洪詳請發帑 淮揚所屬黃運湖河工程在在俱稱險要下關民命上塵

宸衷為各省漕運之咽喉作兩郡州邑之保障若不及早修防設有貽誤干係匪輕舊例每年霜降後即將

明年各廳歲搶修各工應用料物准照今年用過料物多寡數目酌核預發料價飭令各廳遵領乘此工務稍暇之時分頭購辦早運貯工以備明春開工應用如領帑不即辦料以致遲延誤工者查出嚴加叅處此真未雨綢繆有備無患之良法美意也自憲臺榮莅以來歷今十有餘年悉照舊例而行並無遲誤惟查今年批發六十年分預備料物銀兩按照上年所發之數有不及一半者有僅及三分之一者即使

照數領出購辦已恐工用不敷乃無如河庫又槩以  
無銀找支為辭即間有找支者為數亦復無幾各廳  
蒿目撫心束手無策坐虛寬閒辦料之日月徒多相  
與諉過之後辭本道即嚴加督催亦不能責各廳以  
無米之炊也現蒙憲諭明歲有 欽差大人看工著  
各廳將應修工程上緊料理本道有催督之責敢不  
凜遵但修工必先備料備料必先發帑帑不照例早  
發則料物何從購辦後即找支已誤時日責其依限

運工修防無誤勢必不能本道目擊情形不敢緘默  
用敢詳請憲臺查照上年各廳批發預備之數飭令  
具領速為給發使其及早辦運以濟工需以免坐誤  
如有帑銀領足並不辦料以及遲延誤工本道據實  
查揭仰請憲叅以儆怠玩 再詳請發帑 淮楊所  
屬黃運湖河各處隄岸工程最為險要攸關 國計  
民生向例各廳歲修搶修各工應用料物於每年霜  
降後即照本年用過料物數目酌核預發明年料價

飭令各廳遵領採辦貯工以備明春開工應用此歷  
來舊例遵循已久惟是今年批發六十年分預備料  
物銀兩按照上年所發之數或不及一半或止及三  
分之一各廳遵批請領而河庫輒以無銀找支為辭  
間有找支其數亦復無幾以致各廳束手無措勢必  
坐誤本道有催督之責難辭嚴譴用是憂心如焚已  
於本月十五日詳請憲臺未蒙批示頃接閱邸抄會  
清河一案查勘工程處分甚嚴同屬河工諒無岐視

倘明年 欽差大人來南看工設有貽誤干係甚鉅  
本道寢食靡寧不憚煩瑣用敢再籲憲臺迅賜查照  
往例將各廳應領預備銀兩酌量再為批發給領俾  
得及早辦運既有以濟目前喫緊之工需又可以杜  
後來卸過之口舌若仍前因循在各廳因河庫扣項  
繁雜無銀找支推諉延挨勢所不免萬一有誤工需  
則會清河之覆轍可鑒而上下考成均干未便至於  
各廳領足帑銀並不辦料或辦料無多不足應用以

致遲誤工程本道察實詳揭聽候憲叅以儆怠玩前  
詳已悉茲不復贅 三詳請發帑 河工修防料物

為主年前預辦成例昭然查六十年分預備料物銀  
兩前經本道兩次詳請查照上年之例給發蒙批云

云當即飭行各廳遵照去後茲據各廳呈稟有稱年  
內奉憲批發預備料物銀兩除河庫儘除扣項外所  
餘有二三兩三四兩不等者或稱盡數除扣無  
餘者或稱預備料物銀兩年內並未領發者或稱雖



係署事並未經手預備料物銀兩者本道稔知河工  
重大兼之身任督催實難含糊責各廳以無米之炊  
也惟山安一廳領發較之別廳頗覺不同即本道責  
之以速辦儻運事亦頗易然安得淮揚道屬盡如山  
安廳者使本道得以督責之今裏河同知錢士鏞置  
預備料價於不詳不領矣署外河同知胡璉推卸修  
防工程於題補引見之王德祚矣高堰通判楊三炯  
安清通判孔傳煥揚河通判夏建鼎止就領發之數

儘銀辦料矣山盱通判張杓年方少壯緣病請休置  
預備料價於不問矣江防同知或應署事之甘士調  
領辦或應復任之胡璉領辦時已入春尚無定局將  
來桃汛一臨各廳有全不辦料者有雖辦料而不敷  
應用者倘遇暴風異漲勢必束手無措本道代人受過  
固所甘心然而國計民生關係甚鉅杞人之憂  
不得不鯁鯁過慮也查五十九年分歲搶修淮揚道  
屬如外河山安裏河江防等廳估報銀五萬四萬兩

上下不等揚河廳估報銀二萬五六千兩山盱廳估報銀一萬四五千兩高堰安清等廳亦估報銀九千一萬兩不等現蒙憲臺確核陸續具題是五十九年分各廳所用料價業有成數今六十年分應發預備料物銀兩自應做照給領飭令各廳預為購備方免貽誤今查各廳詳領之數無多除扣之項甚夥且不詳不領者又比比皆是是六十年分預備之事較之五十九年之例大相徑庭矣再查五十九年分河銀

存庫等事案內蒙憲題請原疏內稱緊要工程臨時請撥遲緩莫及況六十年歲搶修料物例於年前發帑預辦尤難遲緩查六十年歲搶修料物銀三十萬兩以十五萬兩扣留鹽庫補還風浪殘缺等事案內借動銀兩以清款項以十五萬兩解交河庫俾帑項有備而工程得無貽誤等語是鹽庫借項業已扣還淮關額徵仍屬全支以此現在之銀儘作六十年分預備料價及各案大工之用原自有餘今本道所屬

之裏河廳迎水庵等處大工及外河廳王家莊大工銀兩雖蒙憲檄飭知批發而河庫究未全給其六十年分各廳預備料物銀兩又概以河庫無銀為辭其中事宜各有司存原非本道職所應知更非本道職所宜言但工程關係國計民生修防必須有備無患懇祈俯鑒愚忱恩賜查照上年成例將各廳應發預備料物銀兩趁此初春之候再為飭發雖或不能悉如五十九年之數然多得一分之帑銀即多辦一

分之物料早得一時之詳領即早濟一時之急需本  
道竭力督催各廳竭力辦運若能不誤修防皆出自  
憲臺福庇矣 四月日又詳請嚴飭備料河工修防  
料物為先必宜預儲於暇日乃可取給於臨時是以  
本道於上年歲底暨本年春初疊次呈詳請照往例  
批發帑銀嚴飭各廳預辦六十年料物以備修防之  
用業蒙憲批各屬應解河銀已經嚴檄催提仰候解  
到另行飭領該道仍轉飭各廳將領過銀兩先行辦


料運工修防毋得遲誤干谷當經遵行轉飭至再至  
三乃邇者桃汛已過伏秋瞬息即屆查各廳所備歲  
搶修料物有竟未到工者有到工寥寥無多者有竟  
未動工者有動工而僅以此些微料物草草補苴者此  
皆各廳狃安目前僥倖將來之故習耳曷思今春旱  
暘已久即伏秋霖潦之徵黃淮水勢目今微弱即伏  
秋盛長之兆盈虛倚伏夫豈待智者而後知邪苟不  
及今水勢未發之前嚴催運料急儻做工誠恐一入

伏秋雨霽水漲當此時始言備料斷難取辦於崇朝  
當此時始言做工豈能施工於徒手臨事張皇必致  
貽誤則未雨綢繆之計不得不早為究圖者也除各  
廳辦運到工料物以及做工動用料物數目本道按  
月造具清冊送憲核查外相應呈請憲臺俯念工需  
最重嚴飭各廳將所有奉憲批發過歲搶修料價銀  
兩急速購料運貯工所以資捍禦庶免臨時束手本  
道身在同舟豈敢坐為秦越之視不得已而大聲疾



呼非以苟塞督催之責正求為河工收先事預防之  
效也伏祈俯賜嚴飭各廳一體遵奉如有仍前觀望  
辦運不前者本道據實查揭仰請憲叅以警怠玩有  
裨河工洵非淺鮮矣

嚼梅軒  
偶存



行水金鑑卷五十五